



INTRODUCZIUN

DA MARCEL KÖHLE

«Buca tema» u «buca teme!» ei ina exclamaziun che nus uдин adina puspei ella sontga Scartira. Ella stat era en stretg connex culla veta da Jesus: In aughel annunzia cun quels plaidis la naschientscha a Maria ed alla fossa vita annunzia in aughel aschia la levada da Niessegner.

«Buca teme!» – Quella exclamaziun uдин nus oz treis gadas egl evangeli, el qual Jesus plaida tier ses giuvnals. Jesus tarmetta els cun sia nuviala ora el mund, mo el sa era ch’ei vegn a dar problems e ch’ils giuvnals vegnan a sentir l’opposiziun da certs carstgauns. Malgrad la resistenza ch’ei sa dar, duein els buca piarder la curascha. Els duein saver, Dieus ei cun els sin via ed els ein sut sia protecziun.

Quella nuviala vala era per nus! – «Buca teme!», nus essan en ses mauns, Dieus protegia nus ed ei cun nus en mintga mument da nossa veta.

EVANGELI

Mt 10,26–33

²⁶Mo buca teme! els! Pertgei nuot ei zuppau che vegn buca scuvretg, nuot ei tschelau che vegn buc enconuschent. ²⁷Quei che jeu ditgel a vus el stgir, annunziei ella glisch, e quei che vus udis ella ureglia, clamei giu dils tetgs.

²⁸Buca teme! quels che mazzan il tgierp, mo san buca mazzar l’olma. Temei plitost quel che sa far ir alla malura olma e tgierp egl uffiern. ²⁹Vend’ins buca dus paslers per in pèr centims? E tuttina croda buc in dad els per tiara, senza che vies Bab sappi. ³⁰Mo quei che pertucca vus: Tut vos cavels ein dumbrai. ³¹Buca teme! pia. Vus valeis dapli che bia paslers.

³²Scadin che confessa mei avon ils carstgauns, quel vegn era jeu a confessar avon miu Bab ch’ei en tschiel. ³³Mo scadin che snega mei avon ils carstgauns, quel vegn era jeu a snegar avon miu Bab ch’ei en tschiel.